

COLUMNA


FOTO HACKSPOILER CC BY 2.0

Il rispli

In omagi ad in utensil dal mintgadi

LAURA SCHÜTZ/FMR

El vegniva già utilisà avant 5000 onns dals Egizians. Per tudestg na vegn el stgandelusamain betg numnà correct, sch'ins resguarda il fatg ch'el consista atgnamain or da grafit – e betg or da plum. El è, e vegn era adina a restar, il guaffen il pli impurtant d'in uman creativ: il rispli.

Senza quest object fiss l'umanitad persa. Nagin auter utensil na para uschè lev, sch'ins al tegn enta maun, nagin auter utensil n'ha già gidà uschè blers carstgauns.

Enconuschas ti material da scriver che sa lascha duvrar per occasiuns uschè multifaras e ch'è talmain resistant a la glisch sco in rispli?

Nagin stilograf n'ha ina durada da vita uschè lunga, cunzunt sch'ins smatga sco jau uschè fitg durant scriver ch'il piz da la tinta rumpa.

Nagina color na sa lascha allontanar uschè facilmain sco il rispli. E cun nagina color na sa lascha trair in stritg uschè lung (cun il rispli fin dapli che 50 000 meters!).

Nagin culli na sa lascha utilisar tar mintga temperatura e situaziun. Scriver cun il chau engiu u en l'univers è mo pussaivel cun in rispli. Plinavant na dat il rispli betg sin la gnerva cun ina ramur da clic mules-tusa sco il culli.

In rispli ha dentant anc bler dapli abilitads zuppadas. El n'è betg mo nizzaivel en situaziuns dal mintgadi, ma el ha era già salvà ad inqual persuna la vita.

T'imaginescha che ti faschessas naufragi e ta tschentass sin in'insla solitaria. Senza il rispli fissas ti pers. Mo cun ses agid pon ins trametter in messadi en buttiglia che resta legibel. Sche nagin bastiment da salvament duess arrivar, pos ti almain conservar tias aventuras a scrit per ils proxims ch'arrivan sin l'insla. E tuttina tge adversari che ti pudessas inscuntrar, cun il piz giz dal rispli al pos ti dar il culp da grazia.

El spendra vitas. I al dat en diversas direzzas e furmas, uschia ch'el sa lascha duvrar per lavurs artisticas, ma era matematicas. El vegn era anc a vegnir utilisà en 5000 onns da tuttas e tuts.

Il rispli.



Laura Schütz da Falera lavura sco praticanta redacziunala tar la FMR.

FOTO MAD